

## Фиқҳ дарслари (22-дарс). Фароиз китоблари



13:30 / 27.02.2019 4118

«Фароиз» сўзи «фарз» сўзининг жамиидир.

«Фарз» сўзи эса «ўлчов», «кесиш» ва «баён қилиш» маъноларини англатади.

Шариатдаги фарз амаллар ҳам ўлчоғлик, кесиб айтилган ва баён қилинган амаллар бўлгани учун «фарз» деб аталган.

Мероснинг «фарз» деб айтилиши эса меросни ўлчаш шариат томонидан кесилган иш, ҳар бир меросхўрнинг ҳаққи аниқ кўрсатилиб, баён қилинган бўлгани учундир.

Яъни меросдан тегадиган маълум насибага ҳам «фарз» дейилади.

«Меросхўр» деганда, ўлган одамнинг ортидан ундан қолган нарсани олишга бирор шахснинг қолиши тушунилади.

Фиқҳий тушунча бўйича, майитнинг ортидан шаръий ворисга қолган мол ва ҳуқуқларга «мерос» – «фароиз» дейилади.

Мерос – фароиз илми эса ҳар бир меросхўрнинг қолган меросдаги мол ва ҳуқуқлардан тегадиган насибасини аниқлаб берадиган фиқҳий ва ҳисобий қоидалардир.

Ҳанафий уламолардан «Дуррул Мухтор» китобининг соҳиблари мерос илмини қуидаги таърифлайдилар:

«Меросхўрлардан ҳар бирининг тарика ва ҳуқуқлардаги ҳаққини аниқлаб берадиган фиқҳ ва ҳисоб усулларини ўз ичига олган илм фароиз (мерос) илмидир».

Мерос - фароиз илмининг асосий далил ва ҳужжатлари Қуръони карим, Суннат ва Ижмоъдан олингандир. Бу илмда қиёсга ўрин қолмаган.

Қуръони каримда мерос ҳақида Нисо сурасида учта, Анфол сурасида битта оят келган.

Набийимиз алайҳиссаломнинг Суннатларида бу мавзу бўйича бир неча ҳадиси шарифлар бор.

Ижмоъга келсак, саҳобаи киромлар момонинг мероси ҳақида ижмоъ қилганлар.

Мерос - фароиз илмининг самараси ва фойдаси шуки, уни ўрганган одам меросни ҳақдорларига тақсим қилиш малакасига эга бўлади. Бу илмнинг билимдони «Фароизий» деб аталади.

Мерос, яъни фароиз илмининг ғояси тарикадан ҳар бир ҳақ эгасига ўз ҳаққини етказишdir.

Фароиз илми фиқҳ илмининг шўъбаларидан биридир.

Фароиз илмига Аллоҳ таолонинг Ўзи асос солгандир.

Бу илмнинг фазли жуда ҳам улуғдир. Уни «Илмнинг ярмидир», деганлар ҳам бор.

Фароиз илмida бир қанча мавзулар ўрганилади:

- Мероснинг арконлари;
- Мероснинг шартлари;
- Меросни ман қилувчи нарсалар;
- Меросдан тўсиладиганлар;
- Эркак меросхўрлар;

- Аёл меросхўрлар;
- Фарзандларнинг мероси ҳақида;
- Ота-она ва асабанинг мероси;
- Бошқанинг сабабидан асаба бўлиш;
- Бошқа билан бирга асаба бўлиш;
- Сингиллар ва калола мероси ҳақида;
- Ҳажб масаласи;
- Махрум қилувчи ҳажб;
- Нуқсон қилувчи ҳажб;
- Махрум қилувчи ҳажбга учрамайдиган меросхўрлар;
- Махрум қилувчи ҳажбга учрайдиган эркак меросхўрлар;
- Махрум қилувчи ҳажбга учрайдиган аёл меросхўрлар;
- Муборак биродар масаласи;
- Машъум биродар масаласи;
- Муштарак масала;
- Эр ва хотиннинг мероси ҳақида;
- Бобо ва момо мероси ҳақида;
- Вало орқали мерос ҳақида;
- Аёл томонидан бўлган яқинлар мероси ва ҳоказо.

Фароиз китоблари ҳар бир фуруъул фиқҳ китобларида бўлишига қарамай, уламоларимиз бу мавзуга бағишлиланган алоҳида китобларни ҳам кўп ёзишган.

## **1. «Фароизи Сирожийя».**

Ҳанафий мазҳаби уламолари ёзган фароиз китоблари ичida энг машҳурларидан бири ва бизнинг диёrimизда кўп тарқалгани «Фароизи

Сирожийя»дир. Бу китобнинг иккинчи номи «Фароизи Сажовандий»дир.

«Фароизи Сирожийя»ни имом Сирожуддин Мұхаммад ибн Аҳмад ибн Абдуррашид Сажовандий Ҳанафий таълиф қилган. «Фароизи Сирожийя» күпчиликка маъқул бўлган ва кўпчилик тарафидан дарслик қилиб ўқилган машҳур китобдир. Шунинг учун ҳам Ҳожи Халифа «Кашфуз-зунун»да унга ёзилган шарҳлар рўйхатини келтирганда, бу рўйхат икки саҳифага яқин бўлган.

## **2. «Ал-фароизул Ушнуҳийя».**

Шофеъий мазҳаби бўйича ёзилган фароиз китобларига «Ал-фароизул Ушнуҳийя»ни мисол қилсак бўлади. Унинг муаллифи Абул Фазл Абдулазиз ибн Али Ушнуҳий Шофеъийдир (ҳижрий 550 йилда вафот этган).

Бу китобни Абдурраҳмон ибн Мұхаммад Рашидий Мисрий ва бошқалар шарҳ қилганлар.

## **3. «Фароизул Жаъдийя алал мазҳабил Моликийя».**

Моликий мазҳаби бўйича ёзилган фароиз китобларига Абу Мұхаммад Ҳасан ибн Али ибн Ажъад Моликийнинг «Фароизул Жаъдия алал мазҳабил Моликийя» ва Абул Қосим Аҳмад ибн Мұхаммад ибн Халаф Ишбилийнинг «Фароизул Ҳувфий» китобларини мисол қилишимиз мумкин.

Мовароуннаҳр уламоларидан бир қанчалари бу мавзуда китоблар таълиф этганлар. Улардан баъзиларини мисол учун зикр қиласиз.

1. Аҳмад ибн Исмоил Темиртоший Хоразмий Ҳанафий (ҳижрий 600 йилларда вафот этган).
2. Саъдуддин Масъуд ибн Умар Тафтазоний раҳматуллоҳи алайҳи (722-792). «Шарҳи Фароизус-Сирожийя» китобини таълиф қилган.
3. Сайид Шарийф Али ибн Мұхаммад Журжоний. Ҳижрий 804 санада Самарқандда «Шарҳи Фароизус-Сирожийя»ни ёзиб битирди.
4. Абул Қосим Маҳмуд ибн Умар ибн Мұхаммад Хоразмий Замахшарий раҳматуллоҳи алайҳи (ҳижрий 538 йилда вафот этган). «Ар-роиз фил фароиз» китобини ёзган.

**“Фиқҳий йўналишлар ва китоблар” китобидан**